

# „VIRVĪTĒS“ derliaus kraitelie – naujē kompaktēnē pluokštelē

MUKĀTĒ LORETA

Portēgrāpējuos dešinie (nu vēršaus): folkluora ansamblis „Virvītē“ koncertoun „Baltica 2008“ festivālie; „Virvītēs“ ansamblis 2009 m. Lietovuos dainū švēntie Vilniou. Keiichi Kagi portēgrāpējēs



Sūris ont sūrē, sūris ont sūrē, vo unt vēršaus – kepalīušis. A žēnuot kas? Juk truoba ēr stuogs.


Akadēmēnē žemaitiu jaunima korporacējēs „Samogitia“ folkluora ansamblis „Virvītē“ beveik pēnkiuolēka metu statē truoba, kūrē sava, kāp žemaitē saka, gīvenēma. Šalēp pamatēni vainēka sonierusiu žemaitiu Mukātēs (Sungailienēs) Loretas, Gaubītēs Margarītas, Kimtītēs (Zajančkauskienēs) Inetas stuojuos dainininkā, kēlē ēš ivairiū Lietovuos vēitu. So kuožnās metās mūsa dainas daries vēs skombesnēs, suodresnēs. Išskērtinis diemesis žemaitiu tradicēnē dainā, anuos atlēkēmou padiejē tvērtus pamatus mūsa truobā. Dainininkā, kāp rousts pri rousta, tvērtā sokēba ēlgam laikou. Pečiu truopni somūrējuom – pri anuo šēlduos mažne 40 dabartēniū „Virvītēs“ žmuoniū.

Saka, ka šeimīna i naujus nomus tor keltēis par pēlnati – ka būtom gausi ēr turtinga. Musintās būsem pataikē – torem turtinga ēr gausiejontē „Virvītēs“ šeimā. Lēikt tik pasēdžiaugtē – iškeltē tēkras žemaitēškas ikorēs. Kvēitam ē Tamstas.

Mūsa švēntie pabūsēt klausīdamē žemaitēšku dainū, mozēkas, tarmēškas rokundas. Vēskon ton sodiejuom i naujē sava kompaktēnē pluokštelē, katron pavadēnuom „Aš budavuosiu marga dvareli“. Tēi žuodē ir ēš Raseiniu krašta dainuos „Oi ūžkit, gauskit“, vo be anuos juokēs ikorēs tamē kraštē neliuob apsieitē. Ta ē mes, būdamē karto, kordamē sava šeimās ēr gīvenēmus, be dainū neapsieinam. Mums anuos tēik tink ē prītink, ka tou džiaugsmo nuorem ē so Tamstuoms pasēdalintē. Linkam maluonaus pasēklausīma ēr pasēdainiavēma.

Pluokštelie skomb jaunima-meilēs, vestoviu, šeimuos, darba ē vaišiu tradicēnēs dainas, instrumentēnē ē šuokiū mozēka – tas, kas paded atskleistē jaunū žmuoniū bendravēma gruoži, šeimuos ē savū nomū kūrēma džiaugsma, gīvenēma šeimuo ē bēndruomenie patīrti. Tuoks repertuars gālietom tēktē žemaitēšku ikorīu švēntē, aple katruos pauptuos garsa publikacējuo sava tarmē puorēn patīs virvītininkā. Tuoki pasirinkēma liemē 2009 m. Tūkstontmetē dainū švēntēs Folkluora dēinā „Žeminēle žiedkelēle“ ansablē parēngta temēnē pruograma, katra vēsēms – ē atlēkiejems, ē žiūruovams – soteikē daug maluoniū išpūdiu ē naujuos patērtēis.

Irašīta 2009 m. Klimkas Giedriāus ēr Lietovuos liaudēs kultūras cēntra irāšu studējuos. Garsa režisierē: Klimka Giedrios, Motiejūns Rīms. Sodarē Sungailienē Loreta. Dizaina sokūrē Rībakovienē Deimantē. CD išleidēma parīemē Lietovuos Republikas kultūras ministērējē, Žemaitiu kultūras, akadēmēnē jaunima ēr vākū riemēma fonds.



Naujuosēs kompaktēnēs pluokštelēs viršielis. Dailininkē Rībakovienē Deimantē

Ansablē vadovē Sungailienē Loreta.

Elektruoninis pašts lsungailiene@gmail.com.

„Virvītēs“ irāšītas ēr išleistās onkstesnēs kompaktēnēs pluokštelēs: „Par Vēdogrē lauka“ (2000 m.), „Vuoj strazdeli, strazdeli“ (2002 m.), modernizouta žemaitiu folkluora pruojejks „A mon sakā?“ (2005 m.).